

ХАНТЫ ЯСАҢ



Основана
1 ноября 1957 года

23.12.2021
№ 24 (3588)

Няврэмът мойдупсэтн катдуптәсыйт



6 »

«Йис картәйт валупсы» кәсупсийн нух питум няврэмәт аңкидал пила

Шуши
мир
апраң не

» 7

Рәт ясңал,
рәт мирл
олаңән путәртәл

» 8-9

www.khanty-yasang.ru

Ёмвошн
увәс мир
кәсупсы вәс

» 12-13



Муй щирн округ Дума депутатат рэпитсат

Ван хятлуп тылащ 15-мит хяталн Ёмвошн округев Дума хот кэща хэ Борис Хохряков айкелят акатты хуятат пила мирхот верас па путартас, муй щирн там манум олн Югра депутатат рэпитсат.

Сырья ийха акташум ханнехуятат елпийн Б. Хохряков путартас, хути кашаң ай муй вэншак вер, мата ут округев вух лунятты тахи поступсэт щирн вус па непека нух ханшас, дыв ин хулиева тэса па йма лэщатсат.

Ин тамхатл вус эвалт па елды пелы, лув ясаңдал, щирн, Думаин валты депутатат ищиты тунщираңа рэпитты питлат. Вантэ, бюджет вухат па кашаң ол мар мет мосты верата кэщайтн немасыя есалдыйт. Щит там йисн 70-кем процент арат вух айлат хуятат ратмалты па енмалты, кэши муй маш верат ймалты, нявремат вэнлэтты, касты верат муй культура тэхета сыр-сыр поступсэт щирн кэщайтн есалдыйт.

Борис Хохряков яснат щирн, йилпа юхатты олэвн округ вух лунятты тахи эвалт ищиты сот мултаскем миллиард шойт вух катсот ветьяң кат миллиард эвалт йилпа округев хоттел ханнехуятат ймсыева валты холты нуша верата есалты питлыйт.

Щит шеңк вэн вухат, дыв 40-кем процент арат округ бюджет тахия хойлат. Тэп 10-кем мултас миллиард арат шойт вух иса йилуп хотат омасты верата юкантсыйт. Вантэ, вух лунятты тахи эвалт кашаң мосты пурайн ши арат шойт вух мады, муйкем арат мосмитл.

Щит, округев Дума хот кэща хэев яснат щирн, шеңк йм па вера мос-

ты рэпата. Шимаш вер тумпийн па пус вух лунятты тахи эвалт немасыя миллиард шоп араткем шойт вух па масы. Щалта ши вухат доля щирн йилуп хот дывела омасты ханнехуятата немасыя сухуптаты питлыйт. Вантэ, юхи хашум олэти хотат омасты компания ех итэх ал ханнехэйти мосты пурайн йилуп хотат ан па малат. Ши щирн шимаш хуятат иса хотлы хашлат, ши патта нетупсы каншты правительства хота юхатлат.

Елды округ Дума хот кэща хэ Борис Хохряков путартас, йилпа юхатты олн «федеральной инвестиционной кредит» щирн па ищиты рэпитты питлат. Ши патта Россия мувев бюджет тахи эвалт немасыя няд мултас миллиард шойт арат вухатн масыйт. Кредит щирн миом вухат унтасн дыв намаслат Сэрханл вош Асэв нумпийн карты нурум лэщатты, лэти щит эвалт тутан эхлат па арсыр машинайт тывелт-тухелт яңхты щир мушатсат.

Арсыр шимаш вер тумпийн Дума хот депутатат там манум олэвн йилуп поступсэт вусат, мата уат унтасн дыв щирдалн тынесты-лэтасты айшак муй вэншак тэхетн рэпитты ханнехуятата, ар ханнехэ енмалты хоттел хуятата ймсыева нетты питлат.

Ищиты гостиничной бизнес, дэты-яньшты, сыр-сыр тэхетн рутьшаты, вэнлтыйлды, кэши-маш



Б. Хохряков. ugra-news.ru сайт эвалт вуюм хур

ймалтыйлды, культура па касты вератн рэпитты хэит муй нечат елды ймсыева илемкем процент арат налог вухат олэв мар сухуптаты веритлат. Сырья, вантэ, пандемия маш вер елпийн кашаң лув щиралн рэпитты ханнехэ государства веткем процента арат вух и ол мар еша павтум па холумтум вухдал эвалт сухуптас.

Б. Хохряков яснат щирн, ин шимаш экономика верат валлат, хута иса кашаң ол мар, матты ки мув вой нух холумты хуятата ищиты сыр-сыр льгота щирайт немасыя вердыйт. Ши унтасн нефтяникат ин ймсыева па тэса арталлат, муй арат, муйкем мув илпата елды нух амарты патта худна хашас. Юхи хашум 2021-мит олэвн матты ймкем арат нефть йилпа вэйтсы, тунщираңа вантса па непека ханшсы.

Арсыр верат лэщатты кутн Дума хот депутатат округев луватн шимаш йилуп поступсы вусат, мата утлал унтасн жилищно-коммунальной вух су-

хуптаты верат 15-кем процента щира версыйт. Катрашак па шимаш уат араттелн 22 процента арата ал ханнехуятатн хулиева, талателн сухуптасыйт. Щит округев хуватн валты ханнехуятат патта йм нетупсы.

Мет юхи хашум ясчалн Борис Хохряков шимаш айкел верас па лупас, хути округев Дума хот депутатат эвалт дыв тата мосванн Российской Федерациян труд министр кэща хэя непек китсат, мата уталн немасыя ханшас, муй щирн ин санаториян лекцитты хуята и хатл мар валты патта аршак вух есалты мосл. Эхат Россияев здравоохранения министр кэщая па ханшас, лэти вакцинация верты ханнехуятата мосты льгота щирайт па ат лэщатсат. Ши унтасн, вантэ, кашаң ай муй вэнлат ханнехэ уколлат доньшаты верат эвалт палты иса ан пил. Щиты там олн Югра мувев Дума хот депутатат арсыр верат ймсыева версат.

Путар ханшас:

Владимир Енов



Ханты ясаң дерамтты тахи ёх мирхот

Ван хатлуп тылащ 13-мит хатлан ханты ясаң дерамтты тахи ёх онлайн ширн мирхот верантсат.

Мет сыры «Ханты ясаң» газетайн рэпитты неңнан, филологической наукайт кандидатнан Надежда Рагинова па Людмила Гурьева «Арсыр тахет, мир рэпатайт немат, интернет ясаңат» немпи путар лунятсаңан.

Н. Рагинова лупас, муң редакцияевн немасыя словарь ханшсүв, муы ширн арсыр тахет, мир рэпатайт па рэпатнекат немат ханшты мосл. Л. Гурьева ястас, округев луваттын вошатн, ай кертатн па вут кертатн

Интернет лэшатды, ширн ванкутлы ши вер оланан айкелат ханшлүв. Ин яха мосл немасты, муы ширн Интернет, электронная почта, сайт, социальная сеть, онлайн, IT-стойбище па па ишимаш ясаңат ханты ширн ханшты мосл.

Ши юпийн О.Д. Ерныхова «Ханты ясаң дерамтты тахи» рэпитты па та немасыя вулаң непек

оланан путартас. Мунева, ши тахия лунум ёха, щит ийха лэшатты нетты мосл.

Юхи хашум артан там тахи кэща не Валентина Соловар ханты ясаң дерамтты ёха пэмашипа лупас па Йилуп ол ёманхатл па та ар хошум ясаң китас.

Путар ханшас:
Людмила Гурьева

«Вестник угроведения» – мет ям журнал

Щиты учёной совет мирхот пурайн Асугорской научной институт кэща лаңкар не Елена Косинцева лупас. Щит ван хатлуп тылащ 2-митн вэс.

Там одн Асугорской институт 30 ола йис, ширн мирхот пурайн кэща не Виктория Сподина ай тас:

» Ши арат ол мар муң хушева 400 научной монография, йис путраңмоньшатн непекайт па па утат етсат. Госзадание ширн ол мар муң учёной ёхлүва 75 научной путар ханшты мосл, муң аршак ханшлүв. Яң ол мар 800 научной статья етас, ширн финно-угроведение па североведение па та ар унтас тэлүв. Мет ям, муң хушева хантэт па вухалят рэпитлат па дыв рэт ясеңел па йис валупсэл дерамтлат. Интам муң хушева 41 научной рэпатнек, ши эвалт арсыр наукайт 5 доктор па 14 кандидат, 73% – щит хантэт па вухалят. Институтэв тывум пурайн уша версүв, ясаңат, йис путраң, моньшат, араң, йис валупсы дерамтты питлүв. 2002-мит ол вүш эвалт наука, 2007-мит ол рэт ясаң литература учебникат ханшты олцитсүв.

Асугорской научной институт 30 ол постаты щира кэща не В.И. Сподина научной рэпатнеката ишакты непекайт мойлас. Йис путраң, моньшат, араң акатты тахи венлат научной рэпатнек С.Д. Дядюн ар ол яма рэпитмал па та округ дума эвалт вулаң ишакты непек ёша холумтас.

Ши тумпи округ дума пишмайт ёша вүсат: Н.А. Герляк, В.Л. Сязи, И.М. Молданова па па хуятат. Т.В. Волдина Россия мувев просвещение министрства эвалт благодарность непекн ёша катлуптасы. Л.В. Кашлатова Россия мувев наука па высший образования министрства эвалт ишакты непекн мойласы.

Ши юпийн институт кэща лаңкар не Е.В. Косинцева 2022-мит олн йилуп рэпата оланан ай тас. Уша йис, хуты дыв округев луваттын хатл мар ай январемат тайты хотат, ашколайт, колледжат пида рэпитты питлат.



Асугорской институт рэпатнекат. Л. Гурьева верум хур

2022-мит ол вүш эвалт институт ёх рэт ясаңа венлтаты ёх Форум лэшатты питлат, ши тумпи рүщ па рэт ясаңа венлтаты ёх па та мастер-классат лэшатлат.

Па ол вүш эвалт дыв научной рэпатнеклар рэт ясаң па йис валупсы саманча венлтаты январемат пида рэпитты олцитлат. Ши тухалпи дыв рэт ясаңат па Увас мир литература хуват кат касупсы лэшатлат. Ит – ашколайтн, кимит ут колледжатн венлдылты январемат па айдат ёх па та верлат.

Рэт ясаңатн диктант тумпи научной институт ёх «Рэт ясаңан путартлүв» немпи вер лэшатлат па «Вут кертан ашкола-сад» йилуп шир вантман тайты питлат.

Научной рэпатнекат «Родной язык в дошкольном образовании. Проекты «Эффективные практики» венлтаты хар лэшатлат. Ши тумпи рэт ясаңа, Увас мир литература венлтаты па та немасыя киникайт ханшлат.

Ёхат институт научной тахет кэщайт лупсат, муысар йилуп верат дыв па тэллат.

Путар ханшас:
Людмила Шульгина



Ван хэтлуп тылэц 5-мит хэтлэн мир луват вэн мирхот вэс. Ёх күтэлн карты шүңкэт мухты путэртсэт. Ши мирхот 180 арсыр мўвэти вэлты ёх лэцэтсэт, щит яха пилтэцшум мира нэтэсты ёх. Тэм мирхот шурсаң карты шүңкэт мухты мўвев луваттын вантса. Кашаң хәннехэ тэм путрэт рэт ясаңдалн хэлэнтсэт. Ёх путрэт рүц муй па английской ясаң мухты 100 мултас ясаңа тулмащтэсайт. Ши күтн ханты ясеңев ищи мўв луваттын сащэс. Федосья Лельхова, Зинаида Лонгортова, Тимофей Молданов па Татьяна Молданова ханты ясаңа тулмащтэсэт.

Мўвев-йиңкев лавэрт сурт, тэрмев шэк нэпэт

Муй пата мир а́ктащсэт па муй олаңан путэртсэт. Тэм мирхот «Вэн вер. Шэк нэпэт. Йина арт» немн немэтсы. Тыв а́кташум мир путэртсэт мўвев-йиңкев лавэрт суртэт олаңан, тэрмев шэк нэпэт пела керлум олаңан па муй вўрн ши вер эвэлт йира питты.

Тэм мирхота ар мўв сўң эвэлт ар ёх ям вўща ясэят китсэт. Сыр-сыр лэңхата поякщэты ёх, щит папа римский Франциск, Армения тэрум хот Натан Оганисян, мусульман ёх имам Амир Азиз па па ар хуят. Ям вўща ясаң китсэт мўвэт хуца кэрща омэсты ёх, щит Австрия хон хэ Шандор Габсбург-Лотринген, Конго хон ими Диамби Кабатусуила Тишйе Муата па па ёх. Тэ-та учёной ёх, политикэт, ханшты ёх па па арсыр хуятэт путэр тайсэт, иса мирхот 12 щос мэр мәнэс.

Тыв а́кташум ёх и нумэсн вэлты хуятэт. Лыв щирелн мўң тэм йисн ювра вэлупсийн вэллўв, ши пата мўвев-йиңкев шэкэнтты питэс. Тэм хэтл вэлты вэлупсэв «пурмас нелты вэлупсы» немэтса. Нявремлўв, айлат ёхлўв сыр-сыр карты шүңкэт мухты нумэсдал юврая керэйтлайт. Лыв мулты пурмас тэмхэтл дэтлэт, хэлэвэт ши пурмас йира вущкалэт па йилуп пурмэса

вўратлэт. Ши олаңан вера ар хуят путэртэс. Физика па математика наукайт тохтур Людмила Фионова тэмэщ ясаң хәннехэйт олаңан лупэс: «Ин мўң «гомо сапиенс» (нумсэң хәннехэ) хэн, ин мўң «гомо консьюмерис» (нелты хәннехэ)».

Тэм хэтл мўв луват нумсэң ёхлўв нумэсдал тэп «нелты хәннехэ» пела керлуман вэллэт. Мўң мулты яма рэпитты карты шүңкэт тайлўв ки, хэлэвэт ши шүңкен хурамэңашэк верла па хәннехэйтэ эрн, реклама мухты тынэңа вортлайт. Ши хәннехэ нэмэсл, алпа, йина ши тэмен ям ут. Сыры тэюм, аң шўкалум пурмасэс, яма рэпитты пурмасэс ел вущкэллэ. Иилуп пурмэса вух а́кэтлэ. Вущкум пурмасэт тэпэранампэра йилэт. Ин мўвев нюр тэпры-нампры пая йиты питэс. Йис хэнтэт щиты хэн вэсэт, йис ясаңан «сэм ал вохлэ, ал потлэ», немэлт мултас пурмасэс аң кәншсэт, Нўм тэрмев эхтынн яңхты хэ Михаил Корниенко лупэс:

» *Ма нэмэлтэ мўв пела вантлум, мәнэма яма кэл, щорсэв хўват вэн напрэң пэхрэт нопэтлайт. Мўв эхтынн вэн нампры пайт кэллэт. Нэмэлтэ яма кэл, Амазонка мўв еша вэлняр хэр лота йил, щимурт сора вэнтэт сэвэртлайт.*

Ши вэнтэт мўң нелсэллўв. Вэнтэт щит мўң далты рўвев, дыв худалэт, далты пишең худал. Мўв-йиңк лавэлман вэлты кэща хэ Дэн Лаффоли лупэс:

» *Щорэсн вэлты вой-хўл тэмхэтл шэкэнтты питэс, лэут аң тайлэт, щорэс йиңк каврума йиты питэс па кислота вущремэт тэта ара йисэт. Щорэслўв ки шэкэнтлэт, мўвтел вэлупсы шэкэнтл.*

Тэмэщ лавэрт сурта мўң хойсўв и щирн, щит «пурмас нелты вэлупсы» вэлтэв пата, кимэт щирн па мўвев-тэрмев лавэрт сурт нэпэата хойсэт. Щимэщ лавэрт сурт вэллэл кашаң 12 щурэс олн. Ин мўң ши арта ши юхэтсўв. Ханты щирн щит «шэкэң йис», моньшатн-путрэтн ши вэл. Наука щирн па мўң Хэтлэв иса пўш нўм киньща нўм тэрумн дэриман вэл. Кашаң 12 щурэс ол лўв атум тэхия юхтыыл. Щирн нўм киньща нўм тэрум эвэлт мўң хуцева аң кэлты атум сўлтумэт юхэтлэт. Ши сўлтумэт лылаң войт, хәннехэйт вэллэт, мўвева ши сўлтумэт ищи атмэт. Ши сўлтумэт тайты каврум рўв эвэлт, мўвев хошумла, щорэс йиңкев хошумла, увэс мўв яңхлўв лудалэт. Мўвев лыпийн лудэң карты эвэлт, лудам кев эвэлт каврум сэм путалы вэл. Ши сэм путалэл ин ториты питэс. Щорэсн

арал тэхийн илтаса каврум рўв нух этты питэс. Щалта па мўв сэм эвэлт каврум лавэң тўт нух этты питэс. Ши каврум рўв эвэлт мўвев ел сухэл тохты питэс, мўвев хэлеңа йис па тўтэң лавэт айлта нух йиты питлэт. Атлантида па Гренландия яңхлэт ши пата ши лудалэт, илтаса каврум рўв юхэтл, яңхэл илпийн хошум дорэт тывлэт.

12 щурэс ол тумпийн ищи тэмэщ верэт вэсэт. Щирн арал пелэк вой-хўл пэрэс, арал-пелэк хәннехэ пэрэс. Мўвев вера ториты питэс, питы тўтэң пэсаң, каврум лавэт ар тэхетн нух етты питсэт. Щирн ар верста кэрщэт хумпэти мўвев элты тэсы. Учёной ёх щирн пэрэс 90-кем % лылаң вой-хўл.

Муй вўрн ин тэм лавэрт сурта па аң хойты. Ши пата мўвева яха а́кташты мосл па и нумэса питты. Мўң эрлўв-щомлўв, мўң нумэслўв и тэхипела керэйтты. Щимэщ вэлупсы альщэты питса «Мўв-йиңк лэцэтты вэлупсы».

Тэм вэлупсийн нумсэң ёх нумэсдал и тэхия керлэлэт, мўң аң питлўв йилуп киньща йилуп шүңкэт лыв эвэлтэла вохты. Щирн «пурмас нелты вэлупсы» нюр йира питл, мўв луват хәннехэ нумсэт эр тайлэт, ши нумсэт эр мўв аңкев лавэрт сурт эвэлт нух питты эша китлэв.

Путэр хәншэс:
Пётр Молданов



Росгвардия ёх мевд, посәт катлуптәсәт

Росгвардия вет ола йис, ширн округев 91 ол постум елпийн Ёмвошн Росгвардия хуца служитты ёх немасыя мевд, посәтн катлуптәсийт.

Округевн Росгвардия тәхи кәшә, полиция хуца полковник хә Евгений Симаков эвәлт сот хуят щимәщ мевд, пос холумсәт. Щи ёх күтн кәт шуши хуятәңн, щит рәпитты тәхет давалды вер тәты тәхи кәшә ләңкәр хә, полиция хуца полковник, вухаль хуят Игорь Копьев па Росгвардия хуца айкеләт хәншты хә, сержант, хәнты айлат хә Артём Енов.

Игорь Копьев 25 мултас ол рәт мөвев давалман вәл, 2014-мит олн мөвтөл мир тәл, Олимпиада пурайн Сочи вошн вантман вәс па

па ишимәщ верәт тәс. Яма па вешката служитман «За доблесть в службе», «За боевое содружество», I, II па III-мит степень «За отличие в службе» мевд, посәт тәйл.

Сержант хә Артём Енов пәта щит оләңмит мевд, пос. Лүв Росгвардия тывум пура вүш эвәлт щәта служитл. Лүв ши тәхи рәпата оләңн айкеләт хәншәл.

Росгвардия айкел ширн хәншәс:
Людмила Гурьева



А. Енов па Е. Симаков

ВЭЯТН ШИ ОЛӘҢҢАН

Лыпәт хойты тыләщ 30-мит хәтләң 2016-мит олн Ёмвош округевн Росгвардия тәхи ләщәтсы. Щәта служитты ёх иса муй верләт, дәлн терроризм па экстремизм верәт ал тывсәт. Лыв пушканәт тыныты вер ямсыева нух вантләт, рәпитты тәхет давалдәт.

Шуши хуятәт хот ләтты нәтлүйт

Югра мөвевн 2006-мит ол вүш эвәлт шуши хуятәт вәлты хотәт ләтты нәтлүйт. Щи пәта кәшә ёхлүвн поступсы верман вәл. Интәм субсидия вухн мәлүйт ши ёх, хуятат 2015-мит ол вәнты вохты непекәт хәншийлсәт. Интәм вәлты хот ән тәйтты ёх очередя ән хәншлүйт.

Тәм ванән мүн округевн хот омәсты верәт тәты департамент ёх иньщәссүв, хутыса интәм ши поступсы хуят шуши ёх хотәт ләтты нәтлүйт.

Муй арат хәннехә 2021-мит олн субсидия вухн мәсы, муй арат вух лывела сухуптәсы?

► Тәм олн ван хәтлуп тыләщ 1-мит хәтл вәнты 289 семья хот ләтты щира нәтупсы вухн сухуптәсы. Щит 2014-мит ол ван хәтлуп тыләщ вәнты вохты непек хәншум ёх. Ия-ха ки лүңәтты, лывела 912,779 миллион шойт вух сухуптәсы.

Муй арат вух тәм ол ет-

www.khanty-yasang.ru

шәты вәнты шуши хуятәта па мәлы?

► Ас потты тыләщн ши вер пәта па вух мәсы, ширн ин 2021-мит олн, ияха ки лүңәтты, шуши мирәта вәлты хотәт ләтты щира 1 512,683 миллион шойт вух сухуптәды.

Интәм очередян вәлты хәннехуятәт хот ләтты муй па мосты верәт оләңн иньщәсты хутыса шир тәйләт?

► Ин субсидия вух мәты верәт әхтйин хот омәсты департамент хуши федеральной па региональной программайт тәхи ёх рәпитләт. Иса карты кел номерәт мүн,

сайтәв хуши уша павәтты рәхл: <https://ds.admhmao.ru/kontakty/>. Ши тумпи иса мосты верәт оләңн хәннехәйт сайтәв хуши уша верты пищ иши тәйләт. Щәта иса ёх немәт хәншман вәлләт, мәтайт вохты непекәт хәншийлсәт, па муй лывела ин мосл верты, дәлн субсидия вух ёша холумты: <https://ds.admhmao.ru/merysotsialnoy-podderzhki/>.

Муй арат вух мосл, дәлн иса хуятәта, хуятат непекән хәншман вәлләт, вәлты хотәт ләтты щира вух мәты?

► Ши вер пәта хәткем миллиард шойт арат вух мосл.

Кәртәтн вәлты хуятәт хута йилуп хотәт ләтләт? Итәх хуятәт хот омәсләт муй әнтә?

► Тәм олн иса хуятәт эвәлт 70 процент ёх вошәтн хотәт ләтсәт (Ёмвош, Сәрханл, Нягань, Нижневартовск, Югорск, Урай, Нуви сәнхум вош, Советский, Лаңки пос вошәт), 30 процент хуятәт ин вәлты ай вошәтн муй кәртәтн хот ләтсәт. 2021-мит олн дапәт хоттел ёх вәлты хот омәсты вүт-щийлсәт, ширн ши вер пәта вухн мәсыйт.

Путәр хәншәс:
Надежда Рагимова



Нух питум нявремат ишакты непека́тн па мойлупсэ́тн катлупта́сыйт

Ван хатлуп тылащ 10-митн, округев се́ма питум хатла́н «Югра-Классик» хотн округ губернатор не Наталья Комарова арсыр ка́супсэ́тн нух питум нявремата ишакты непека́т па мойлупсэ́т мойла́с.

Ши кү́тн «Йис кэ́ртат вэлупсы» ка́супсы́йн ка́сты итэх э́вет-пухат Ё́мвоша юхты́йлса́т, щит Анастасия Новью́хова Игрим вош э́ва́лт, Данила Самсонов – Ё́мвоша́н пух, Марья́м Мурады́мова, Таисья́ Рядьки́на, Надежда Алга́дьева, Макси́м Алга́дьев Хули́мсунт кэ́рт э́ва́лт па Никита́ Молда́нов Ярки́ кэ́рт э́ва́лт. Мосл лупты, яң хуя́т нух питса́т,

лапа́т э́ви-пух мойлупсы́ ё́ша холумса́т.

Путра́т ханшты́ па́та нявремат пира́щ ё́х пи́да вэ́йтанта́йлса́т, йис кэ́ртат ола́нн иньца́сса́т. Ши тумпи́ дыв архива́, катра́ пурма́са́т дава́лды, киника́йт лў́на́тты хота́та яңхса́т па нау́чной непека́т лў́на́тса́т. Дыве́да вэ́ндта́ты ё́х па а́нкет-а́щет ханшты́ не́тса́т.

» Ола́нмит та́хия питум э́ви Анастасия́ Новью́хова щиты́ ханша́с: «Игрим – хурам, сы́стам во́шие, ма лў́вел мосман та́йдем. Мў́ң ху́щева мой́ңа юхтаты́! Ма ны́нана и́са во́шев а́ль-лум», – Ю́гра мў́в кэ́ща не лупа́с. – Ше́нқ э́ма́щ, ху́ты ны́н нух питла́ты, е́лды и́щиты ка́слаты́!

Данила́ Самсонов а́нқел рэ́т Тэ́к кэ́рт, Надежда́ Ал-

га́дьева о́пращел, Менк-вья́ кэ́рт, Марья́м Мурады́мова Хал-павыл кэ́рт, Никита́ Молда́нов а́н-ка́нқел-а́нщащел, Итьях вў́т кэ́рт ола́нн ханшса́т. Нявремата́ ше́нқ э́ма́щ вэ́с губернатор э́ва́лт ишакты́ непека́т ё́ша холумты́.

Ши ю́пийн ё́ма́нхатла́ Ишки́ Ики́ хилэ́л, пи́да юх-та́с, ды́н нявремата́ э́ма́щ ка́супсэ́т лэ́ща́тса́т, ща́лта и́йха хура́т вў́са́т.

Пута́р ханша́с:
Людмила́ Гурье́ва

Ува́с айда́т ё́х Пу́лца́ва́т во́шн вэ́н мирхота́ а́кта́щийла́са́т

Ван хатлуп тылащн 6-9-мит хатла́тн Ува́с мў́в, Сиби́рь па Да́льний Во́сток мў́ва́т э́ва́лт айда́т ё́х Яма́л мў́ва Пу́лца́ва́т во́ша вэ́н мирхота́ юхатса́т. Калини́град вош э́ва́лт па Чу́котка мў́в вэ́нты 28 та́хи э́ва́лт а́пра́ң айда́т хуя́тат вэ́са́т.

Лыв ши́ вэ́н мирхотн лэ́ща́тты ве́рлад ола́нн пу́та́ртса́т. Муй лыв шу́ши ми́ра́т вэлупсы́ йма́лды щирн, ку́льтура па ху́тыса йис ве́ра́т, рэ́т я́снат дава́лды щирн ве́рлат па ху́тыса е́лды ве́рты питла́т. Мирхота́ юхтум ё́х кү́те́дн арсы́р мосты́ ве́ра́т щирн пу́трема́са́т.

Айда́т ё́х хэ́лум щирн та́м мирхотн ре́питса́т. Щит айда́т шу́рас ё́х ве́ра́т ола́нн, ува́с мў́ва́тн рў́тыща́ты ве́ра́т лэ́ща́тты щирла́т па рэ́т я́снат па ку́льтура ве́ра́т ды́лнуп-та́ты па дава́лман та́йты ола́нн пу́та́р ма́на́с.

Сэрханл ра́йон э́ва́лт нявремат вэ́ндта́ты не Га́лина Ла́птева и́щи ши́ мирхота́ яңха́с. Лў́в ща́та



Ува́с айда́т ё́х мирхот пу́райн.vk.com\ros_sever та́хи ху́р

хантэ́т э́ва́лт э́ксперта́ вэ́с па ханты́ айда́т хуя́-та́та не́та́с. Щиты́ дыв «Сохранение, развитие и популяризация языкового и культурного наследия КМНС» та́хи ху́щи ре́питса́т. Ши та́хийн айда́т

хуя́тат я́ртья́ң, арсы́р ве́р ванла́тса́т. Ши тумпи́ Га́лина Павло́вна рэ́т я́са́ң уро́к та́с. Лыв айда́т ё́х пи́да «Ханты́ я́са́ң вэ́ндта́» ю́нтупсы́ лэ́ща́тса́т.

Мой́ңа юхтум айда́т хуя́тата́ Пу́лца́ва́т вош

ванла́тса́т, Горно́князе́вск та́хия та́тылясы́йт, ху́та дыв та́м мў́вн вэ́лды шу́ши ми́р вэлупсы́ шивала́са́т.

Ю́хи ха́шум хатла́тн нух питум хуя́тат мойла́сы́йт, хуя́тат гра́нт ка́супсы́йн ка́сса́т, йилпа́ тывум ве́ра́т ванла́тса́йт па «Таланты́ Росси́йского́ Севера́» вэ́н е́тнхот лэ́ща́тсы, ху́та ара́ң-яка́ң ё́х а́риса́т па я́кса́т, на́ра́сты ю́хатн ю́нтса́т.

Айда́т ё́х йилуп нумэ́сн, йилпа́ тывум ве́ра́т пи́да ю́хи рэ́т мў́влада́ ма́нса́т, дэ́дн рэ́т ми́рел ку́льтура, я́са́ң дава́лман та́йты па ши́ э́хтыйн е́лды ме́т та́са па а́пра́ңа ре́питты́.

Га́лина Ла́птева а́йкел щирн ханты́ я́са́нн ханша́с:
Надежда́ Ильи́на



Шуши мир апрӑң не

Округев ёмӑңхӑтл пурайн ван хӑтлуп тылӑщ 10-мит хӑтлӑн шуши мир пурмӑсӑт лавӑлды па шавиты «Торум Маа» тӑхи кӑща не Людмила Алфёрова иши сема питум хӑтлӑл постӑслӑ. Тӑм ол лӑв 55 тӑда йис. Лӑв Манстӑр район Перегрёбной кӑртӑн нуви тӑт шивалӑс.

Людмила айтелн аҫкилы-ащилы хӑшӑс, Зоя Ивановна Проскуракова имаялн енмӑлды па вӑлупсы вӑн ӑша китсы. Ӑшкола етшуптумал юпийн айдат эви Ёмвоша нявремӑт вӑндтӑты неҫа йиты мӑнӑс. Ӑхӑт Тӑпӑл вошн Менделеева немпи институтн вӑн непекаҫ хуята йис.

Людмила Александровна 20 мултас ол ӑшколайн рӑпитӑс. 1997-мит одн лӑв Нягань вош «Югра дьлнуптӑты» тӑхия кӑща неҫа пирисы. Тӑса рӑпиттал пӑта 2002-мит ол вӑш эвӑлт апрӑң неҫие вет пӑш округ «Югра дьлнуптӑты» оса тӑхи вице-президента пирийлсы.

Иши артӑн лӑв Югорской государственной университетн шуши нявремӑт вӑндтӑты подготовительной тӑхийн кӑща неҫа вӑс. Щӑлта 2006-мит одн Л. Алфёрова увӑс мир департамент тӑхия рӑпитты вохсы. Увӑс мир VI-мит вӑн мирхот пурайн Людмила Алфёрова уральской федеральной округ вице-президента пирисы. Шуши мир культура па вӑлупсы нух алумты щирн ар мосты вер лӑшӑтӑс па округ губернатор олаҫ лӑңкӑр хӑ Г. Бухтин советника павӑтсы.

2017-мит ол ай кер тылӑщ вӑш эвӑлт шуши мир пурмӑсӑт лавӑлды па шавиты «Торум Маа» тӑхи кӑщая йис. Тӑта лӑв иши арсыр мосты йилуп верӑт лӑшӑтл. Лыв щӑта рӑпитты



Л.А. Алфёрова. Н. Вах верум хур

хуятлал пида сыр-сыр вӑйтантупсӑт, вӑндтупсӑт, ёмӑңхӑтлӑт, мирхотӑт верӑнтлӑт, музей тӑхийн йилуп щирӑт лӑшӑтлӑт. Шив ванкӑтлы верӑнтты ӑх ӑктыйлӑт, вӑндтӑты верӑт верӑнтлӑт.

Тӑм рӑпатайл тумпи Людмила Александровна оса рӑпатайл елды тӑлдӑ.

2019-мит одн ван хӑтлуп тылӑщн округевн Нягань вошн верӑнтум увӑс мир вӑн мирхотн «Югра дьлнуптӑты» тӑхи ух неҫа йилпа пирисы. Лӑв арсыр суртӑт тӑңматман па мосты верӑт лӑшӑтман округев луваттыйн па Россия мӑвӑт хӑват яҫхӑл. Шуши мир, сыр-сыр кӑщайт пида вӑйтантыйл, арсыр щирӑт олаҫӑн путремӑл. Лӑв округев вӑнт шушетн вӑлты мир па вой-хӑл, велпӑслӑты ӑх хуца ванкӑтлы яҫхӑл,

нӑша верлал тӑңматты нетл. Тӑта увӑс мирн яма вӑйтлы па сӑмӑңа тӑйды.

Щи арат ол тӑса па апрӑңа рӑпиттал пӑта Людмила Александровна сыр-сыр мойлупсӑтн па ишӑкты непекаҫн мойлдылсы.

Ешӑк Людмила Александровна, мӑң, «Хӑнты ясӑң» непекаҫ рӑпитты хуятӑт, сема питум вулаҫ хӑтлӑн вӑраҫӑн вӑща ясӑҫӑн китлӑв. Уяҫа-пишӑҫа хотӑҫ ӑхлан пида ар ол вӑлаты. Найн-Вертӑн лавӑлман ат тӑйдыиты. Атур суртӑт мухты ат мӑндӑт. Рӑт мӑвен па шуши ӑхлан лавӑлман елды иштиты апрӑңа вӑда. Тӑлаҫ ӑш, тӑлаҫ кӑр! Хӑв йис, хӑв нӑпӑт!

Путӑр хӑншӑс:
Надежда Вах

Майӑлтӑ

(вах хӑнты ясӑҫӑн)

Рытнӑ мӑнлӑх,
майӑлтӑ мӑнлӑх,
Нюла йӑмӑн
яҫлохнаты,
Путытоха, вертӑхӑти,
Маньлӑх, лулпӑнылӑх,
Тӑт пухӑлнӑ ҫӑхилӑты.

Йӑка, йӑка,
вӑса, вӑса,
Тӑрӑм вӑсӑн мӑти.
Юхӑ тӑйнӑ тулы
ватнӑ
Ҷоққәпа сӑтьала-па
сӑйӑн, ӑңки.

Лӑкӑм, мӑннӑ номлы,
Йӑм кӑткӑн мӑнт
тулхӑн.
Юхӑ потӑхвӑлт,
мӑхӑли-ҫӑм кӑл,
Ватнӑ сӑтьвӑл ӑңки
кӑл.

Йӑка, йӑка,
вӑса, вӑса,
Тӑрӑм вӑсӑн мӑти.
Юхӑ тӑйнӑ тулы
ватнӑ
Ҷоққәпа сӑтьала-па
сӑйӑн, ӑңки.

Сӑңкӑх қонақы,
сӑңкийӑки – лӑх,
Лилӑки пӑни вӑлвӑл –
лӑх.
Мӑнхӑс торӑмпа
лӑкепнӑ – лӑх,
Лӑхӑлвӑл, пӑнӑлвӑл, –
тӑя лӑх – ӑңки.

Йӑка, йӑка,
вӑса, вӑса,
Тӑрӑм вӑсӑн мӑти.
Юхӑ тӑйнӑ тулы
ватнӑ
Ҷоққәпа сӑтьала-па
сӑйӑн, ӑңки.

Ар хӑншӑс:
Вера Паньшина
(Кунина)
Вах хӑнты ясӑҫӑн тӑса
хӑншты нетӑс:
Федосья Лельхова



Рэт ясңал, рэт мирл олаңан путартал

Мария Кузьминична Волдина (Вагатова) ван хәтлуп тыләшн 28-мит хәтлән 85 ола йил. Ая вәлмеңн тәм хәтл вәнта ма лүвты йма вәсем, лүв ма щәсем апәлнә па сема питум хәтлән и хәтл. Тәм пүш ма лүв хушала йңхсум па хүв мәр йха путартсумн.

Ма иньщәссем, муй вүрн лүв еңмәс, муй вүрн ариты, хәншты питәс. Лүв щиты ястәс:

» Ма вүды бригада тайты колхозн еңумсум. Ай күр ех хушса сема питсум, хән ши вер непека хәншса, щит Вүтвоша хәншса, ши пәта непекаәтн ма Юильскайн сема питсум. Ши юпийн ащәм-әңкәм колхоза павәтсайңан, щирн Сталин нәм колхоз щәта вәс.

Мария Кузьминична путрәл па елды тәлдә:

» Нюрм мүй хушса щәта ши еңумсум, хәт ол вәнта нюр вүды бригадәйн вәсум, хән нявремәт ашколая әкәтты питсайт, щит дәль пурайн вәс... Бригада нявремәт худыева әкәтсайт, ма лапәт ола әнтә йисум, тәп ван хәтлуп тыләшн йилум, ищимурт вүсыюм. Нәмәс-сәт, ала, лапәт ола йис, ма юпемн апщәңдам Катяём, Проняём вәсңан.

Щиты ши ая вәлмәдн ашколая вүсы, ашколая тәсы. Вүтвошн аңқаңкел пида вәлты питсәңан, Вүтвошн лүв нәл класс етшуптәс.

» Ши юпийн па ветмит класса Касума нявремәт тәсыит, худыева нәлмит класса питум ех тәсыит, – путартәл Мария Кузьминична. – Ши юпийн педагогической училищә китсаюм. Әхәтшәк па Ленинграда мәнсум, щәта мәша йисум, и ол мәр тәп вәндтылдсум.

Әхәтшәк иши тәхийн лүв ши институт етшуптәслә. Щәлта па Мария Кузьминична Касума китса. Лүв лупәс:

» Тәта, ма нявремәт вәндтәсум, ай классәтн рәпитсум, па интернат кәщәя пунсаюм. Ши юпийн па тыв Емвоша ши юхәтсум, педагогической училищәйн рәпитты пит-



М.К. Волдина

сум, педагогика, психология нявремәта вәндтәсум па общежития хушса нявремәт дәвәлты неңа вәсум.

Ши юпийн вәлупсәл па щира керләс.

» Щәлта партиәйн вәсум, мүй щирн така тайсаюв. Педагогической училищә непек юхтәс, щәта хәншман вәс: «Коммунист Волдина ши рәпата эвәлт нух вүты па газетая рәпитты китты». Щиты газетая питсум.

Хәлумьяң ол мәр газета хушса рәпитсум, ратива хүват па путартсум.

М.К. Волдина па Т.С. Себурова 1987-мит олн

Хәтъяң вет ол рәпитсум, пенсия вүша юхәтсум. Хән радиоккомпания 30-мит ола йис, дыв мәнәма мойлупсы тәсәт, ма хуты 25-мит ол мәр вәнештатной корреспондента рәпитсум, ин ки вохләюм, иши йңхлум. «Югорика» хушса па нәң пиләна йха путартсумн.

Ма иньщәссем Мария Кузьминична, ин па муй верл? Лүв ястәс:

» Ин киникайт хәншлум, иса вохләюм арсыр вер олаңан путартты ай нявремәта, кәши-мәш тайты пушхәта, ветеранәт пәда. Ши йңхлум. Округева юхәтты мойң ех пәда па путартлум, ма мүйвем ех





олӑӑн, округ вӑлупсы
олӑӑн путӑртлум. Щиты
щи тӑтӑдӑлым округ вӑ-
лупсы олӑӑн путӑртты.

Щи путӑра янхты тӑ-
хет лӑв нӑпека нух хӑнш-
ман тӑйлӑлӑ, кашӑӑ ол
сот нӑлъяӑ арсыр путӑр
лӑв путӑртӑл. Мария
Кузьминична арсыр мой-
лупсӑт тӑйл:

» Жукова медальн мӑ-
сыюм военный стих-
дам пӑта, хӑт сот ола
пограничной войскайт
йисӑт, сот ол медальн па
мӑсыюм, щит военной
ӑхдан. Ма луплум: «Ма
пограничник хӑн», лыв
луплӑт: «Нӑӑ кӑрщашӑк
тӑхи тӑйлӑн», Шолохов
мевл посн па мӑсыюм.

Мария Кузьминична
вера ар мӑвӑтн вӑс, иса
тӑхетн лӑв мӑвӑл-йиӑкӑл
олӑӑн путӑртӑс. Ма
иньщӑссем, мӑта мӑвӑт
лӑв семн вантӑс.

» Ар мӑвӑтн вӑсум: Нор-
вегияйн, кӑт пӑш Фран-
цияйн, кӑт пӑш Германияйн,
Италияйн, Чехословакияйн,
Югославияйн, Венгрияйн,
нивл пӑш Болгарияйн, нӑл
пӑш США мӑвн. Кӑт пӑш
па щӑта Юрий Вӑлла па
Еремей Айпин пила яха
яӑхсӑв. Японияйн ар мӑв
хӑват па яӑхсум.

Щи мӑвӑт хӑват яӑхман
лӑв рӑт ясӑӑл олӑӑн пу-
тӑртӑл, рӑт мирл олӑӑн
путӑртӑл. Щи пӑта ма елды
иньщӑссем, хӑн лӑв олӑӑ
стихӑт хӑншты питӑс.

» Ма хӑвн хӑншты питсум.
Мет сыры немӑлт хуята ӑн
па ванлтӑслам. Нӑмӑссум,
ма хуты муй, стихӑт хуты
хӑншлӑт элты нумсӑӑ ӑх.
Иньщӑслаюм ки, хуйн
хӑншсы, луплум, хӑнтӑт
хӑншсӑт. Арӑт хӑншийлсум,
щи арӑт диская хӑншман
вӑлдӑт, 30 ол мӑр хотӑӑ ӑх
ансамбль тӑйсум, арисӑв,



М. Волдина нявремӑта нарӑсты сыйт олӑӑн путӑртӑл

яксӑв. Щиты щи вӑлупсем
мӑнл.

Елды па М.К. Волдина
путӑртӑс, муй вӑрн арӑт
лӑв нумсӑла юхӑтлӑт:

» «Алялӑ-алялӑ» арем
муй вӑрн нумӑса юхтӑс,
путӑртлум. Щирн мӑӑ
Еремей Данилович рӑт-
налад кӑртӑн вӑсӑв, финно-
угорской ӑх олӑӑн кина
вӑсы. И хӑтл ма вантсум,
муй вӑрн хӑл велты ӑх,
велпӑс ӑх киная вӑсӑт. Етн
хулыева улты питсӑв. Тӑп
вуюмты питсум, мӑнема
ар сув сӑтыл, нӑмӑслум,
алпа, хуят арийл, нух
киллум, немӑлт сый ӑнтӑ.
Тӑп ухем уллота пундем
па щи хурамӑӑ ар сув хӑллум.
Щирн ма нух килсум па
ким ӑтсум, нӑмӑслум, камн
ампӑт хурӑтлӑт па мӑнема
щиты сӑтыл. Ма юпемн вӑна
ювум ими ким ӑтӑс, лупӑл,
мӑтты щит ма арисум.
Нӑмӑслум, и муй вӑрн
щиты, ма арисум, мӑнема
па па хуят тур сый сӑтыл.
Щи юпийн тӑм ар сув ма
ясӑӑн версум, мӑвем-
йиӑккем лӑнхӑт олӑӑн,
Най-аӑккем олӑӑн. Щи
арем вера мира мосты
питӑс, кашӑӑ пӑш, хӑн ма
фестивалята вохляюм, тӑм
ар щи вӑн финно-угорской
верӑтн щи пунла. Щи вер
20-кӑм ол тумпийн вӑс.



М.К. Волдина

Ин па Йилуп ол пӑта
Мария Кузьминична тӑ-
мӑщ стих китӑс:

Уй тӑп ат тӑс!
Етн хӑнль иты,
Хӑрлал тӑм олыев...
Питлӑв иса нӑмты лӑват.
Лӑв ӑнтӑм вӑлум –
Вӑлупсыя олӑв вӑс!
Лӑв ӑн вӑшл нумӑс ӑвӑлт!
Алӑӑ хӑнль хуты ӑтӑл,
Щиты ӑтӑл йилуп ол!

Ат сурийл сорнеӑ хӑс –
Тумтак вӑлупсы
тӑйты пос!
Мӑвтел мира лӑв ат кӑл!
Сӑма так па рӑв ат мӑл!
Сора верла, хӑнль хӑл
тӑп уй ат тӑс!
Йилуп олн уй ат вӑс!

Путӑр хӑншӑс:
Пӑтр Молданов



Вурщӑк рэт ёх олаңан путӑртсӑт

Ас потты тылӑщ 26-мит хӑтӑлн Ёмвошн «Торум Маа» йис пурмӑсӑт шавиты хот йитн «Арсыр венш хурасуп Вурщӑк рэт ёх» ванлупсы ши тӑхийн рӑпитты хӑннехӑйт вошӑн мир пӑта лӑщӑтсӑт.

Ийха юхтум мир ел-пийн музей хотн рӑпитты не Ирина Ксенофонтон тӑс айкелӑт верӑс. Сырыя лӑв путӑртӑс, хуты тӑм хӑтӑлн йамсыева мӑн вӑлты-холты ширлӑв уша павӑтты олаңан мосл йис пура верӑт нӑмты.

Кашӑн хӑннехӑ вӑлупсы хурасӑт ищипа хуятӑт кӑтн мӑнлӑт. Щимӑщ хӑ ёх муй неңӑт айлтыева ищипа нӑмӑлмӑлӑт, муй ширн хӑннехуятӑт вӑлупсӑл хӑватн вӑсӑт, муйсӑр унтас лӑв рэт ёхлала версӑт.

Мосл лупты, хуты Лӑв юхан хӑватн вӑлты вухалят тӑм хӑтлӑл йм вӑшӑт вӑнты лывел давӑлты лӑнха-калта эвӑлты тухлӑн войт тӑйлӑт. Вурщӑк муй лӑнт тумпийн увӑс мӑв вухаль мир хуца юхи хӑшум ХХ-мит йис пурайн хӑннехӑйт щимӑщ войт лӑнха эвӑлтсӑт, щит кӑрк, хутӑн, сури, пойтӑк, тохтӑн, лӑк, васы па арсыр тухлӑн войт.

Вурщӑк лӑнха па лывел давӑлты тухлӑн воя Лӑв юханӑн вӑлты вухалят эвӑлтсӑт, муйсӑр хӑннехуятӑт Манья па Рахтынья ай юханӑт депн йис пурайт вӑш эвӑлт вӑсӑт. Вурщӑк рӑта-щира лӑнӑтӑсты хуятӑт кӑтн иса хӑткӑм Сайнахов, Оманов, Хатанев па па ёх. Мосл лупты, хуты сырыя Советской лаш юхтум олаңн ши рӑтӑт эвӑлт вӑлум ёх ар пелӑк нӑртама щаврӑмсийт па хулт пелы тӑсыйт. Ймкӑм ар хӑннехӑ ши хуятӑт эвӑлт Вулаң лӑлӑн вӑсӑт па ши хӑрӑтн пӑратсийт.



О.А. Хатанев

Тӑмхӑтл «Торум Маа» музей хуца верум «Арсыр венш хурасуп Вурщӑк рэт ёх» ванлупсы немасыя округев Дума хотн шуши мирӑт ассамблея тӑхи хуца депутат неңа вӑлты Татьяна Гоголева йӑкӑнтсы. Вантӑ, тӑм кӑтн лӑв 60-мит ола сема питум хӑтлӑл вӑш эвӑлт йис.

Щиты «Торум Маа» йис пурмӑсӑт шавиты хотн рӑпитты хӑннехуятӑт лӑв ёмӑнхӑтлӑл йамсыева тӑмхӑтл постӑсӑт. Татьяна Гоголева сема питум хӑтлӑл пӑта «Луи сам» («Увӑс мӑв») вошӑн вухаль неңӑт йӑсӑт-арисӑт па лӑвела йм вӑща ясӑт китсӑт па тӑмиты видео хӑват путӑртсӑт:

»» Ешӑк, Татьяна Степановна! Мӑн, «Луи сам» якты-ариты тӑхи ёх, 60-мит ола йӑвмен пӑта йм вӑща ясӑт нӑңена китлӑв па сема питум хӑтлӑна ар версӑв!

Ши ар хуца иса Татьяна Гоголева рӑтлӑл-шир-



Т.С. Гоголева рӑтлӑл пилӑ



Ванлупсы пурайн. В. Енов верум хурӑт

лӑл, па лӑв депутат неңа рӑпатайл олаңан арсыр хурамӑн ясӑт ийха ӑк-тӑшум хуятӑт хӑлӑнтсӑт.

Щӑлта ванлупсы верты не Ирина Ксенофонтон путӑртӑс, муй ширн па хуты Вурщӑк рэт хӑннехуятӑт тывсӑт па вӑлупсы ширлӑл лӑщӑтсӑт.

Лӑв ясӑл ширн, ши рӑт Сайнаховӑт, Омановӑт, Хатаневӑт, Гоголевӑт, Мерровӑт па па ёх эвӑлт тывсӑт. Мет олаң рэт нӑмпи хӑя мӑтты Максим Сайнахов лӑнӑтсӑл. Лӑв олаңн сырыя айкел эвел Мария Анямова тӑс. Лӑв кӑрӑш, таксар па веш-

кат хӑннехӑя вӑлупсы хӑватн вӑлмал, иса рэт ёхлала веритты кемн не́тмал.

Ванлупсы етшуптум пурайн Дума хотн шуши мирӑт ассамблея тӑхи хуца депутата вӑлты не Татьяна Гоголева арсыр тӑхетн рӑпитты хӑйт па неңӑт эвӑлт сыр-сыр хошум мойлупсы ясӑт хӑлӑнтӑс. Кашӑн ай муй вӑншӑк хӑннехӑ тумтак па йм вӑлупсы ширӑт лӑвела тӑта лӑнхас.

Путӑр хӑншӑс:
Владимир Енов



Няврёмат якты вәнлътаты нє



▲ Евгения Валерьевна Ищки ики хиднеңа вєс. 2019-мит ол



▲ Е.В. Бойко

Нуви сәнхум район Касум вошн «Прометей» немпи культура хот рэпитл. Кэщяя щата Наталья Алексеевна Канева вөл. Кўлуп хот вошәң мир пәта рэпитл, щата ёмәңхәтләт пурайн әмәщ етнхотәт дэщәтлүйт, хәнты па рўщ щирн якәт яклуйт, арәт арилүйт.

Няврёмат па вән хуятәт кўлуп хотн хәнты па рўщ щирн якты вәнлтыйлты щир тәйләт. Лывты щи вера Евгения Бойко вәнлътәл. Тәм ол товийн ма лўв пиләда вәтаңа йисум. Лўв 2012-мит ол, вўш эвәлт кўлуп хотн рэпитл.

Евгения Валерьевна Касум вошн енмәс. Аңкел – Ольга Викторовна Каксина – юрн нє, Нефтеюганской район Сытомино кәртән енмәс. Интәм Касум вош пәльницайн пуртәнәт доньштәты неңа рэпитл. Ащел – Валерий Ильич

Каксин – хәнты хә. Лўв няврёмат хәтл мәр тәйты хот лавәлман рэпитл. Щиты Евгения Валерьевна рәт ёхдал оләңән путәртәс:

» Мәнема әмәщ ай пура олдам нәмәлмәты. Мўң хотәң ёхлўв пида вәнта воньшумутәт, тулхәт әкәтты йәңхийлсўв. Аңкем, ащем па апщем пида Амня юхана нәшты йәңхсўв. Щәта мўң хот тәйлўв. Ащем холуп омсәс. Лын ин вәнты ванкўтлы щив хўд велпәсләты йәңхләт. Вәнтэв, юханэв хурамәң! Хәтл мәр камн юнтсўв. Ап-

щем ин ищи енмәс, Сургут-нефтегаз хуши рэпитл.

Евгения Касум вошн әшкола 2007-мит олн етшуптәс. Щи юпийн Ёмвошн технолого-педагогической колледж хуши вәнлтыләс, мўвәт-автәт лавәлды вер әхтыйн рәпатнека йис. Щәта лўв якты вәнлтыйлты йәңхиләс, арсыр ёмәңхәтләтн эвет па пухәт пида якәс. Вәнлтыйлты етшуптумал юпийн 2011-мит олн лўв Касум рәт кәртәла керләс, 2012-мит олн кўлуп хотн рэпитты питәс.

вән хуятәт рўщ якәт, хәнты па па арсыр мир якәт якты вәнлътәлум. Няврёмат әмщә ма хущема юхәтләт. Лыв Касум вошевн иса ёмәңхәтләтн мир пәта якләт. Щи тумпи Нуви сәнхум воша ёмәңхәтләта ищи йәңхлўв, – лупәс Евгения Бойко.

2013-мит олн лўв икия мәнәс, щит Ваньшавәт кәртәң хә Антон Андреевич Бойко. Лын кәт няврём тәйләңән, пухән тәм ол әшколая 1-мит класса мәнәс, эвән хәлум ода йис.

Ма дәңхалум Евгения Валерьевна па лўв хотәң ёхдала лупты, яма, тәлаңа ат вәлдәт. Ешавәл йилуп ол ёмәңхәтл питл, щирн ләңхалум, дәлн елды ол лывела ар уй, ар амәт, ям вер ат тәс!

Путәр хәншәс:
Надежда Рагимова

ВЭЯТН ЩИ ОЛӘҢҢАН

Касум вош культура хотн интәм щимәщ якты-ариты тәхеңән рэпитләңән: «Увәс ариет», щәта хәнты неңәт якләт па ариләт; «Асья кыа», щив сәран мир неңәт йис арәт ариман па якман йәңхләт. Щи тәхеңәна йәңхты хәннехуятәт кўлуп хотн ән рэпитләт, тәп якты муй ариты щира щив юхтыйлдәт. Лыв па тәхетн рэпитләт муй па рўтьшуман вәлдәт. «Увәс ариет» муй «Асья кыа» якты-ариты хотәңәнн хуши вәлды ёх сыр-сыр етнхотәтн вошәң мир пәта ариләт па якләт. Вошәң мир мосман лыв пеләда вантләт.

» Ма айтелн хурамәң якәт якты вер сәмәңә тәйлум. Щирн әшколайн вәнлтыйлдем пурайн кружока йәңхийлсум, арсыр етнхотәтн яксўв. Щәлта Ёмвошн щи вер ищи ән хәйсем. Нумәсн юхәтсыюм сәмема мосты вер әхтыйн рэпитты. Ин няврёмат па



Ёмвошн увас мир кәсупсы вәс

Ван хәтлуп тылҗщ 8-12-мит хәтләтн Ёмвошн увас мир кәсупсы вәс.

Тыв Ёмвош округ, Тюменской область, Красноярской край, Магаданской область, Саха Республика, Ямал мұв, Эвенкийской, Чукотской автономной округат эвәлт кәсты ёх юхәтсәт. Иса мұвәт эвәлт 81 хуят, 18 ода ювум айлат ёх әкүмсәт па кәссәт. Непек ширн кашәң мұв эвәлт тыв тәп и команда китты рәхл, щит кәсты щира яха пилтәшум ёх. Увас мир кәсупсәт ләшәтты тәхи кәща хә Олег Хатанев ясаң ширн, увас мир кәсупсы ин иса увас мұвәтн вана тәйты питса, кашәң ол аршәк айлат ёх щит кәсупсыя әр-шом ванлтәты пәта юхәтләт. Тәп тәм одн арум мәш пәта итәх ёх Ёмвоша ән юхәтсәт.

Тәм увас мир кәсупсы йис вәлупсыйн вәлум вер, йисн ёх ёмәңхәтләтн кәсты вер тәйсәт, щит тәхийн лыв әр-шом ванлтәсәт, сора хәхәлты, кәрща навәрты па сыр-сыр верәт кәсман ванлтәсәт. Тәмәщ апрәң, ёшәң-күрәң, верәт увас

мир вәлупсыйн, вой-хүл, ведты тәхийн вера моссәт.

Тәм хәтл увас мир кәсупсы ширәт – щит әхәл, шәпи навәрты, тынщаң, вәл әхтыя китты, лаюм хү-вашәк вушкәты, кәт күрн еслумтуман хәлум пұш навәрты сәхум, сүв пилә вәнт хушә хәхәлты. Икет 3 верста, имет 2 верста хәхәлләт.

Тәм хәтл вәлупсыйн щит кәсты йис верәт ищира верты питсайт. Йисн хуты хә хуятәт яха әкүмләт, каркам, апрәң, верәт ванлтәты пәта вүлдыйн йәңхты әхләт вана талләт па щит әхләт нәмәлтыя навәрләт. Ин әхләт юкәна кәрәщ хушәпәт вердәйт, икет пәта 50 см кәрщаттыйн, имет пәта 40 см кәрщаттыйн. Йисн тәм кәсупсыятн навәрсәт тәп икет, ин имет ищит навәрты питсәт.

Олег Хатанев ясаңән:

» Тәм йисн мастера йиты лавәртшәк, мастер норма



Олег Хатанев

арашәк верса. Сыры мосәс 300 әхәл шәпи навәрты, тәм хәтл па 520 әхәл шәпи навәрмәты мосл. Кәт күрн еслумтуман хәлум пұш навәрты сәхум сыры мастера йиты пәта 10 метра навәрмәты мосәс, ин па 10 метра па 70 сантиметра. Щит хуты яма ванлтәл, мұң кәсты ёхлүв әрәңашәк па каркамашәк йиты питсәт.

Мұң Югра мұвевн увас мир кәсупсы хүвәңшәк тывас, тәм Ёмвош кәсупсы тәхия сыр-сыр мұң мұв

вошлүв эвәлт 11 хуят тыв юхәтсәт, щит мет әрәң па апрәң айлат ёх.

Саха-Якутия, Ямало-Ненецкой автономной округ, Красноярской край хушә ищит мұң итәва тәм увас мир кәсупсы вана тәйла, щит пәта щит мұв эвәлт юхәтты кәсты ёх вера тармәт. Тәм кәсты тәхит ләңкәр хә ясаңән, юхтум ёх хулыева вера әрәт. Чукотской автономной округ вүты ки, щәлтаса нәл, пух па хәлум эви юхәтсәт, лыв хулыева кәсты тәхетн



Кәсупсыя юхтум ёх



Эви кәт күрн еслумтуман хәлум пұш навәртәл



Кәсүпсы пурайн



Эви кәсты хәрн

вулаң хуятат, муй па кәсты мастера йиты нем тайлдат. Лыв кәщаел пида юхәтсәт, щит Павел Диечков Анадырь вош эвәлт. Магаданской область ки вүлэв, лыв Владимир Лебедев вәндтәты хәел пида юхәтсәт, кәсты хуят щәта йртъяң хәннәхә: хәт пух, па хәлүм эви. Ищи лыв йма кәссәт, сыр-сыр эрашты тәхия яңхләт па олҗән тәхия нух питыйлдат.

Тәм кәсүпсы сүтытты эх ищи арсыр мүвәт эвәлт вәлдәт. Мәта мүв эвәлт кәсты эх юхәтсәт, щәлтаса сүтытты хәннәхә вәл.

Команда кәсүпсыйн нух питум вер тәмиты вәл:
 – Ямало-Ненецкой автономной округ – 1 тәхи;
 – Югра мүвев – 2 тәхи;
 – Саха (Якутия) – 3 тәхи.

Әхәл шәпи навәрты тәхийн икет күтн нух питәс Владислав Черненко (Магаданской область), кимәт тәхи еша павтәс Максим Салиндер (Ямал), хәлмит тәхия питәс Егор Терентьев (Якутия). Имет күтн олҗән тәхи еша павтәс Елена Соловьева (Красноярской край), кимәт тәхия питәс Мария Куртямова (Ямал), хәлмит тәхия – Елизавета Штанько (Югра).

Тынщаң вал әхтия вушкәты тәхийн кәсман икет күтн мет ар пүш тынщаңал вал әхтия Юрий Лаптандер (Ямал) вушкәс, лүв юпелн Дьулустан Туприна (Якутия) вәс, хәлмит тәхия Игорь Макаров (Эвенкия) питәс. Имет күтн тынщаңал мет тәса Алина Кондратенко (Красноярской край) вушкәс, кимәт тәхия питәс Валентина Борисова (Якутия), хәлмит тәхи еша павтәс Людмила Поросенкова (Югра).

Лаюм хүвашәк вушкәты кәсүпсыйн икет күтн мет хүва Юрий Лаптандер (Ямал) вушкәс, кимәт тәхия Дьулустан Туприн (Якутия) питәс, хәлмит тәхия – Мичил Лазарев (Якутия). Имет күтн Ольга Эттына (Чукотка) лаймәл мет тәса па хүва рәкнәс, кимәт тәхия питәс Полина Петрова (Тюменской область), хәлмит тәхия – Валерия Тимофеева (Югра).

Кәт күрн еслумтуман хәлүм пүш навәрты сәхумн мет хүва наврәс икет күтн Андрей Ливенцов (Магаданской область), кимәт тәхи еша павтәс Владислав Черненко (Магаданской об-



Якутия мүв айләт эх. П. Молданов верум хурәт

ласть), хәлмит тәхи – Артём Лакиенко (Югра). Имет наврум тәхийн мет хүв сәхмәт таймад Мария Максименко (Магаданской область), кимәт тәхия питәс Мария Ижик (Югра), хәлмит тәхия – Елена Соловьева (Красноярской край).

Мет сора икет күтн сүв пида вәнт хуца хәхләс Максим Салиндер (Ямал), лүв юпелн әш сухнум тәхия Кирилл Кузаков (Эвенкия) юхтәс, хәлмит нух питум хәя йис Давыд Окотэтто (Ямал). Имет күтн сүв пида мет сора хәхләс Елена Соловьева (Красноярской край), лүв юпелн юхтәс Евгения

Филиппова (Югра), щәлта па Валентина Борисова (Якутия).

Тәм увәс мир кәсүпсы Россия Кубок тәхрум тәхийн ар йм ясаң лупсәт «ЮграМегаСпорт» хуца рәпитты хәннәхәята, лыв иса тәхет, иса верәт йма ләщәтсәт, щипәта кәсүпсы пайды мәнәс.

Сүтытум эх эвәлт ясаң тәйс кәща хә Олег Хатанев, лүв кәсум эха елды эрәңән апрәңа вәлты пәта памтупсәң ар йм ясаң лупәс.

Путәр хәншәс:
Пётр Молданов



Ай Ас ики па лүв Айне эвел

Елды путар. Олаң моньшан
путар газетав 23-мит номеран
лунтаты.

Әхәт мом ики пида
вәйтантайдмал вер
йүпийн Айне эвие шеңк йма
па ташаңа вәлты питәс.
Аса хул ведпәсләты ки
яңхәл – иса арсыр ханты
хүлдәтн ай ләңкәр әхлыел
тәлыева ләп пундәлэ, вән-
та вой кәншты ки мәнл
– хәлүмкөм пүш әнтпәл
питы нюхәс войн иса ләп
тахәртләлэ.

Имудтын ащел ики
лүв атәлт вәлүпсы ширәл
вантты юхтыләс. Ай Ас ики
тәп әл нух амтәс, хути лүв
сәмәңа тәюм эвел ташаңа
вәлты питәс.

Айне ищи күрумн
ащел хүләң-лантәң пәсан
елпия омсәлсәлэ, арсыр
лүтутн лүвел ләпәтсәлэ-
яньшдәтәслэ. Еша Ай Ас
ики эвел хуца вәс па юхи
мәнты ләшәтыләс.

Щәлта Айне ким етәс па
ащел ай ләңкәр әхлыел

тәлаңтелн ханты хулн муй
вәнт вүлы нюхийн ләп
пунсәлэ па ймсыева ил
хәшсәлэ.

Ши киньша Ай Ас ики
юхлы пелы тәп-тәп шә-
шәл па лавәртәңа ләлтум
ай ләңкәр әхләл пәнән
талләлэ.

Хот пундәла велшишәк
ванамәты питәс, хути лүв
Лыско вой ампәл илн улум
тәхел эвәлт нух навәрмәс,
така хурәтты керләс па
хәннехәйт путәртты ширн,
щиты елды үвәлтәс:

» *Вов-вов, вов-вов! Ван-
таты-сәр, ма кәшәем юхлы
йил, лүв мостәң па сәмәңа
тәюм эвиел хуца мойләты
яңхәс, ай ләңкәр әхлыел
тәлаңтелн хүлдәтн па вәнт
вой нюхийн пунум, хути
лүв вурайн юхлы пелы
таләсл!*

Лүв ампәл үвәлты амтәң
ясәят долумты аньхел
имийн хәлдыйт. Щиты ин
ими хотл эвәлт ким на-

вәрмәл, нөвәщ хәш юх
няремәл па хот ләпн ил
йирум ампәл така сәңкәл
па лүведа нөхмәл:

» *Нәң, Лыско, тәта шеңк
атмәщ хурәтлән! Ин па
щиты хурта-сәры: ма
кәшәем юхлы йил, лүв
ай ләңкәр әхләлн сәмәңа
тәюм эвел ух пәшәх па
лүвкәрләл юхи талләлэ!*

Ампәл па, лүв пеләда ән
вантман, мет така хурәтты
керләс па щиты ел амтәң
түрсыйн үвәс:

» *Вов-вов, вов-вов! Ван-
таты-сәры, ма кәшәем ин
юхлы йил, лүв мостәң па
сәмәңа тәюм эвиел хуца
мойләты яңхәс, ай ләңкәр
әхлыел, тәлаңтелн хүлдәтн
па вәнт вой нюхийн пунум,
хути лүв вурайн юхлы
пелы таләсл!*

Ши киньша аньхел
ими уша версәлэ, хути
шәкашты хәщум Айне
эвие шеңк йма па ташаңа
елды вәлты питәс. Шимәщ
вер пәта лүв иса и тәхи
хуца хулна омәсты ән па
веритәс. Щитәлн кашәң
хәтл иса алаң вүш эвәлт па
етная питты вәнты иикел
пелы ләвтәс па партәс
лүведа, ләдн лүв вәншә-
ка ювум эвел пәта ищи
лыв вәлты кәртәл шәнш
хуца ай павәрт хотые ат
омсәс.

Аньхел ими, вантә,
лүв шурема ювум дыпел
па сәмәл илпийн вән
эвел елды вәлты-холты
ширләлн олаңән ищипа
пурайн нәмәсәс па ләң-
хас, ләдн лүв енмәлтум
нявремәл шәкашты эви
эвәлт ймашәк вәлты питл.

Хүв муй ван күт ши
вүш эвәлт пәрәс, кимит
сүс пеләк юхтәс. Ай Ас

икен иимел ләвтәт эвәлт
вева йис, иса түрл вүш
вәнты лүв ләвәтләл ши
юхтуптыйлсәт. Ши пәта
имудты тевәң хәтәлн ин
ики Йис кәртәл шәнш
кимит пелкәда мәнәс па
йилуп вәнши юхәң ай
павәрт хотые омсәс.

Ши вер юпийн тәп
иимел ләвәтты верләл
юремәслэ па атәлт ширәлн
лүв вәншәка ювум эвел
елды мәнты эша әкәтты
пиньшәс. Ши киньша
иикел ай ләңкәр әхләла
кәт йилуп кев пүнәң пунәс,
велши верум пүт хонты
лүйнәң, няленәң, шай пүт,
кәт түт кевнәң, щәшкана
йирум сул ювары па сыр-
сыр ләтутәт муй пурмәсәт.
Әхәт йивләңәлн лавәртәңа
арсыр ләтутәң-пурмәсәң,
ай ләңкәр әхәл вүсы па
йилпа омсум павәрт хотл
вәнты айлтыева тәсы па
эвел ищиты Ай Ас ики
щив ванләтәслэ па вәтша
ширәлн вәлты хәщуптәслэ.

Хүв муй ван эвләңәл
щиты вәс. Имудты етнайн
лүв соләмәт кавәртәс.
Тәп ин эви ләты вүтышәс,
хути па камн ай павәрт
хотл пүнәлн мулты сый
лүв хәләс. Щәлта хот
ләпәлн доньщ шеңк така
шихәрдәты керләс.

Ши вер юпийн мулты
семсай ут лавәртәң күр-
мәтн, хот керәтман сора
мәнәс, вәнши юхәң павәрт-
тәт хәтышәслэ па щиты
иньшмәслэ:

» *Хәй! Муйсәр хәннехәйт
тәта вәлтәл-холтәл?*

Вәнши юхәң павәртәт
илды-нухлы пелы тәп әл
яңхәсәт па хот ләңдыел,
мәтты ки мәшәң хәннехә,
така тәриты па еңәл-
ты вүянтәс. Тәп Ай ики
эвләңәл, иса ән па пәл-

Ханты ясәт

Кай! – возглас удивления с оттенком досады

Хэй! – возглас удивления с оттенком вопроса

Айне ташаңа вәлты питәс – мом ики (людоед)
бывает не только злым и кровожадным, но и добрым
(после своей встречи с девушкой-сиротой он, по-
видимому, обращается к мишьәх и те помогают Айне
на рыбалке и охоте, знакомят её с парнем-мишхә,
её будущим мужем)

мишхә – лесной мужчина-доброжелатель,
приносящий удачу на рыбной ловле и охоте

ханты хул – нельма, муксун, щёкур, пыжьян и сырок
обские ханты Ямала считают хантыйской рыбой

Вов-вов! – так лают собаки в хантыйском
миропонимании

йивләп-әслап – такой-сякой

түра юхтәс – дошел до крайней степени своего
терпения

хүләң-лантәң пәсан – богато накрытый стол

йивләң – отчим

әньхи – мачеха

эвләң – падчерица



Мом ики ай павэрт хотэл шукатум юпелн елды ши шэшмэс.
Николай Носков ханшум хур

тэмуман, лүведа щиты юхлы пелы така нэхмэс:

» Тата ма, Ай Ас ики эвлэң, иса вэтща щиремн сүс пура эвэлт вэдлум!

» Ей, хилне, делүв-яньщлүв! Мудты ям детут па ан-сэн, алпа, тайлэн?

» Щит хуты худта мәнл, щит хуты иса телыева ма хуцэма тэмхэтл вэл, – щитэлн ин Ай Ас ики эвлэңэл, тэмиты шеңк ишкащман, така елды үвты керлэл, – кат йиллуп кев пүтнэн, кат пүт хонты лыйнэн, талдэн кат нйлэңэн, шай пүт, кат йиллуп түт кевнэн, щашка-на йирум сүл юварые па сыр-сыр еплэң детутат муй пурмэсат па хошум ламэтсухат!

Хүв муй ван күт вэнт ики лүв ишкащты щирдал хэлэнтсэлэ па вудаң лыкн ищи күрумн юхатсы. Елды лыкашум верл юпийн мом ики лүв ай павэрт хотл вэнши юхэң сохлэт эвэлт воңхум овэл шүкатсэлэ, хот лыпия луңемэс, эвилеңкие щих велсэлэ па юхи давемэслэ.

Вүр ки мәнэс – вүрд нух яньщсэлэ, нюхи ки тайс – лүв нюхиел пасты

пенкларн пурсэлэ. Кашаң лүвлеңкие ин мом ики ймсыева нух шепсэлэ муй щиписэлэ: тыв вуцкум лүв – ймсыева тыв вуцкэслэ, тухи евлум лүв – тухи евалмэслэ.

Шалта эви ух пэшхэл, адемэслэ, эш күтпала доньщлтэслэ па щитэлн вэн күрмэнт елды пелы лавэртэңа лүв щирэлн ши шэшмэс.

Имудтыйн Ай Ас ики эвлэңэл хуца мойлэтыя мәнл. Хүв муй ван күт лүв шэшэл па ай павэрт хот пүңлала юхэтл па тэп ал щиты ши вантэл: эшэл күтупн эвлэңэл ух пэшхэл, лоньща лукемуман, щикем долэ, еша хүвэншак – тывелт-тухелт лакки евлум лүвдал мутшэслэ.

Шеңк Ай Ас ики палтамэс:

» Па муй вер ши киньща елды вертыя рэхл?

Лүв айлта эвлэңэл лүвдал муйдал ийха акэтсэлэ, ай лэңкэр эхлала нух пунсэлэ, ил хэшсэлэ па юхлы тэслэ.

Ши киньща Ай Ас ики йил, тал лүватн делтум ай лэңкэр эхэл ши тэл.

Хот пүңлала тэп ванаматы питэс, хуты Лыско

вой ампэл улум тэхел эвэлт нух долэс, така ел хурэтты керлэс па иса, ханнехэйт пүтэртты щирн, елды үвтэс:

» Вов-вов, вов-вов! Вантаты-сэры, кэщаём юхлы шэшл, ай лэңкэр эхлэлн эвлэңэл ух пэшэх па лүвдал щикем талдэлэ!

Лүв ампэл үвалты шэкаң ясчэт долумты аньхел имийн хэлдыйт. Щиты ин ими хотл эвэлт ким навэрмэл, нэвэш хаш юх няремэл, па хот лепн ил йирум ампэл така сенкэл, па лүведа нэхмэл:

» Нэң па, йивлап-аслап Лыско, шеңк атмэш ин хурэтлэн! Тэмиты нэңена мол хурэтты: «Ма кэщаём юхлы йил, лүв сэмэңа тэюм эвиел хуца мойлэты яңхэс па ай лэңкэр эхлэл хүдн муй вэнт вүды нюхийн талдэлн делтум, хуты лүв вүраин ин юхлы пелы талэсл!

Ампэл па, лүв пелэда ан вантман, мет така хурэтты керлэс па щиты ел шэкаң түрсыйн үвтэс:

» Вов-вов, вов-вов! Вантаты-сэры, ма кэщаём юхлы йил, ай лэңкэр эхлэлн эвлэңэл ух пэшэх, талдэлн хэщум лүвдал юхлы пелы щикем тэллэ!

Ин аньхел ими иикел ай лэңкэр эхлэл хуца ищи күрумн навэрмэс па, лүв эвиел лүвэлт шивалуман, така-така ел холдэлтэс па эхда ил рэкнэс.

Я-а-а, хуты, муй ши киньща па верты рэхл?! Ай Ас ики хоттел хуятлал пида эвлэңэл лүвкэрдал ймсыева лэщэтсат па шэкаң тэхийн лоттэсат.

Хүв муй ван күт ши верл эвэлт пэрэс. И пүш Ай Ас ики Лыско ампэл пида вэнта вой велпэслэтыя мәнэс. Ямкем хүв дын

велпэсн вэсчэн, ар лаңки па нюхэс вой муцатсэңэн. Ай Ас ики ай лэңкэр эхлыел вэнт вой сухэнт талдэлн лэп пунсэңэн па юхи Иис кэртэна айлта шэшсэңэн.

Тэп дын юхи ванаматы пиньщэсчэн, хуты Лыско ампэл ил долэс, така хурэтты керлэс па иса ханнехэйт пүтэртты щирн елды үвтэс:

» Вов-вов, вов-вов! Вантаты-сэры, мүң ай павэрт хотэв па худта тэсы?! Ин ма тэп тывелт-тухелт лакки евлум хот павэртат, кэща неңем па лүв ай эвел лүвэлт шивалэсум, лыв ух пэшэхлал яңхты эшев күтпа доньщтумат!

Имудтыйн Ай Ас ики Иис кэртэла юхтэс па вера вэн палтапн юхэтсы, хуты шеңк вэн шэкаң вер мом ики лүв хотэң хуятлада па лүведа верэс.

Щитэлн иики момийн шүкатум ай павэрт хотл омсум тэхийн ямкем хүв яңхэс, ийха иимел па ай эвлэңэл лүвкэрэлт акэтсэлэ, ай лэңкэр эхлал дэлтэслэ па шэкаң тэхийн ил лоттэслэ.

Ши вер юпийн Ай Ас ики акэтэс па лүв сэмэңа тэюм Айне эвел хуца Лыско вой ампэл пида китумтак вэлты мэнсэңэн. Эвел ал амтэс, хуты ащел дыв хуцела юхтэс. Ши пураин, вантэ, Айне мишхэ ики вермэл па лүв пилэда вэлты питмал.

Щиты Ай Ас ики, Айне эвел, лүв мишхэ веңэл па Лыско ампэл иса ийха елды яма вэлты-холты питсат. Дыв яңхты эшелн йинтуп ки вуцкэды – елупн ул. Хуятат дыв хуцела хэтэлн шэшлэт-атэлн шэшлэт.

Йис ех пүтрэт хүватн нумсэл щирн моньщ ханшэс:
Владимир Енов



Арсыр хурамӑт вера вӑндӑты ӑшкола

Тӑм ол Югра мӑвн йилуп ширн арсыр верӑт лӑщӑтты Мӑвтел вер мӑнӑс. Тӑм ӑмӑщ вӑндӑты хӑр кӑт ширн лӑщӑтман вӑс: интернет хӑват онлайн ширн па итӑх ӗх вӑйтантупсӑта мойӑа юхтылсӑт. Щит па хон пелӑк мӑвӑт па Россия мӑв эвӑлт йилуп верӑт ӑхтын хуятӑт, лыв саттӑла вер тӑйты ӗх, кӑщайт, научной рӑпатнекӑт, йис пурмӑсӑт ӑкӑтты па шавиман тӑйты хӑннехуятӑт, йис шӑкщӑты верӑт вӑты имет-икет па ӑл ӗх, мӑта хуятӑта сыр-сыр хурамӑт верты шир ӑмӑщ.

Тӑта 30-кӑм арсыр вӑндӑты па тынесты хӑрӑт, лӑнтупсӑт, сыр-сыр вӑйтантупсӑт, мирхотӑт па па угӑт ӑнтӑ тӑп Ӓмвошн, Нижневартоск, Сӑрханл па Нӑх вошӑтн ищи рӑпитсӑт.

Щиты Ӓмвошн «Ай хурамӑт верты щира вӑндӑты ӑшкола» рӑпитӑс. Тыв Москва, Ӓмвош, Сӑрханл, Урай, Мегион, Нижневартоск, Сӑмӑтвош, Нуви сӑӑхум па Ӓмвош районӑт эвӑлт йис верӑт йама вӑты ӗх юхтылсӑт. Щи тумпийн ӑкӑтшум мир пида интернет хӑват онлайн ширн Коми, Карелия мӑвӑнн па па хон пелӑк Финляндия мӑв Тампере па Оулу вошӑнн эвӑлт йис верӑт лерамтты хӑннехуятӑт кӑтӑлн пуртӑрты веритсӑт.

Мойӑа юхтум хуятӑт пуртӑртсӑт, хутыса лыв саттӑла вер тӑйты ӗха сыр-сыр хурамӑт мира вӑндӑты, муйсӑр угӑт мет мослӑт, мӑта угӑт иса ӑн лӑтлӑйт. Щӑлта муй ширн шӑкщӑты мир пида рӑпата тӑты, муй арат вух тум муй тӑм ай пурмӑсые тын тӑйл па па мосты верӑт олӑӑнн ясӑн тӑсӑт.

Олӑӑмит хӑтлӑн «Югра акварельная и не только» немпи хурӑн вӑндтупсы пӑншы. Щи хурӑт Югра

мӑвн вӑдты хурӑт хӑншты не Ирина Быкова хӑншӑс. Тӑм не округевн мет йама «Югра мӑв воньшумутӑт» немпи хурамӑт хӑват вӑлды. Лӑв верум хурамӑт сӑк эвӑлт, щи сӑк Ирина Быкова тынӑн кев эвӑлт верл.

Елды мӑнты хӑтлӑтн мойӑа юхтум мир вӑндӑты хӑрӑтн рӑпитсӑт. Сырыя Москва хон вош эвӑлт Объединенной Нацият тӑхи хуца посол не Вероника Пешкова ясӑн вӑс. Лӑв лупӑс, муй ширн Югра мӑвн верум ай пурмӑсӑт вӑндӑты мосл, лӑлн щитӑт имухты мирн ат лӑтсыйт.

Вантӑ, кашӑн шӑкщӑты хӑннехӑя лӑв мирл йис вӑлупсы, йис верлӑл тӑса вӑты мосл, лӑлн пурмӑсые ӗша вӑюм пурӑйн имухты уша павӑтты, муйсӑр мирн тӑм утые верум.

Щи пӑта ӑнтӑ тӑп шаппака щитл лӑщӑтты – кашӑн мир йис культура ищи йама вӑты мосл. Кашӑн хӑннехӑ лӑв мирл ширӑлн пурмӑс верл. Кӑш щит юнтут, не па хӑ пурмӑс, ан-сӑн, сыр-сыр хурамӑт, лӑмӑтсухӑт па па арсыр угӑт. Щи кӑтн ин йилуп вӑлупсийн йилуп ширӑт олӑӑнн па нӑмӑсты мосл.

Лӑлн ӑнтӑ тӑп верӑн хӑннехӑя щитӑт моссӑт, ӑл хӑннехӑ сӑма ищи ӑт хойсӑт.

Елды онлайн ширн Коми мӑв Сыктывкар вошӑн апрӑн не Светлана Кольчурина хӑлӑнтсӑв. Лӑв «Эхо» немпи арсыр культурайт лерамтты тӑхи кӑщая вӑл.

Тӑм ванӑн Светлана па па апрӑн ӗх унтасн Карелия мӑвн «Карелӑт лӑмӑтсух йилуп ширн» немпи кӑсупсы версы. Кӑсупсийн 114 хӑннехӑ лӑщӑтум лӑмӑтсухӑт вӑндӑтсӑт. Ӓхӑт мет ӑмӑщ па мет тӑса йис шир иты ӗнтум лӑмӑтсухӑт пирисыйт.

С. Кольчурина ясӑн ширн, кӑсупсы тумпийн интӑм аршӑк ӗх йис лӑрлӑл, йис вӑлупсӑл па йис верлӑл олӑӑнн нӑмӑсты питӑс. Мосл ятӑты, тӑм кӑсупсы президент ики грант вух унтасн лӑщӑтман вӑс.

Постоянной форум ООН тӑхийн кӑща лӑӑкӑр хӑ, «Код северных ремесел» вер ӑхтынн кӑща Алексей Цыкарев лупӑс, хуты кашӑн мир лӑв йис вӑлупсы тӑйл. Кашӑн мӑва мойӑа муй рӑпата ширн юхтум пурӑйн сырыя йис вӑлупсы, йис верӑт па рӑт

ясӑнн вӑндӑлӑйт. Щит пӑта мосл, лӑлн ӑнтӑ тӑп шӑкщӑты верлӑв тӑс йис ширн лӑщӑтман ат вӑсӑт, верӑн ӗх пурмӑсӑл тыныты па йама вух ӗша катлупӑтты ищи ат веритсӑт.

Финляндия мӑвн Тампере вошн вӑдты хӑ, «Финляндия – Россия» оса тӑхи ӗх кӑща Рикку Сапонен онлайн ширн ищи пуртӑртӑс, хуты арсыр мирӑт верӑн ӗх тынесты иса ӑн хошлӑт. Лыв щикӑш хурамӑна па тӑса кашӑн утые верлӑт, тӑп тыныты ӑн веритлӑт.

Щит пӑта лыв саттӑла вер тӑты щира немасыя вӑндӑты мосл, щи кӑтн немасыя поступсӑт ищи вӑты, лӑлн немӑлт хуятн ӑн кетумса. Университетн, колледжӑн предпринимательской верӑта айлат ӗх па вӑндӑты, елды лывела кеншӑк рӑпитты пилт.

Юхи хӑшум хӑтӑлн «Торум Маа» тӑхи, Югра мӑв шӑкщӑты верӑт вантман тӑйты оса тӑхи, Ас-угорской институт, «Югорской коллекция» тӑхи кӑтӑлн ӗш пос непекӑ пунсӑт.

Путӑр хӑншӑс:
Ирина Самсонова

Ханты ясанг
(Хантыйское слово)
№24 (3588), 23.12.2021

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора, главный редактор – **Кондина Г.Р.**
Телефон (3467) 33-36-82

Заместитель главного редактора – **Вах Н.И.**
Телефон (3467) 33-24-02

Отвественный секретарь – **Рагимова Н.В.**
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, 14.

Индексы 04393, 54393

Тираж **2166** экз.
Заказ **5211**
Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области,
ХМАО-Югре и ЯНАО.

12+

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.